

Communicaziun a las medias dal cussegl dal public SRG.R

## **La revoluziun mobila tar RTR**

**Cuira, 15-11-2016 – En l'ultima seduta dal 2016 è il cussegl dal public SRG.R (CP SRG.R) sa fatschentà tranter auter cun il schurnalissem mobil tar RTR. Cun il diever da smartphones ha quel survegnì ina dimensiun cumpletta nova. Medemamain è vegnidas prendidas sut la marella las duas produziuns da livestream dal campiunadi grischun da ballape da las scolas medias a Schiers/Aschera e da la discussiun da podium dal Parc Adula a Mustér.**

Grazia als smartphones daventa il schurnalissem adina pli mobil. Il svilup tecnologic permetta la produziun, l'elavuraziun e la publicaziun da videos sin ils differents chanals da distribuziun da RTR. Quellas contribuziuns èn era spezialmain adattadas per las medias socialas. Cun ils telefonins san schurnalistas e schurnalists reagir fitg svelt sin l'actualitad e metter a disposiziun ils cuntegns per in e scadin. RTR na plazzescha las contribuziuns natiralmain betg suletta sin Facebook, mabain era sin sia pagina d'internet convenziunala. Il CP SRG.R beneventa che tant la qualitat publicistica sco era la moda e maniera co ch'ils videos vegnan producids vegnan controlladas permanentamain. Cun la definiziun da process e structuradas cleras vegn era garantì ch'il newsfeed na vegn betg inundà da contribuziuns da RTR. En spezial emissiuns da radio profiteschan da talas publicaziuns supplementaras. Cun fotografias e videos survegnan visitaders da la pagina d'internet [www.rtr.ch](http://www.rtr.ch) e dals ulteriurs chanals da RTR anc dapli impressiuns ed infurmaziuns che pertutgan las emissiuns da radio. Las novitads sin la pagina d'internet vegnan adina pli savens era cumpletadas cun graficas e visualisaziuns attractivas.

## **Livestreams: campiunadi grischun da ballape da las scolas medias e debatta Parc Adula**

Ils rapports dal campiunadi grischun da ballape da las scolas medias dals 30 da settember 2016 a Schiers/Aschera èn vegnids discutads a moda cuntraversa. D'ina vart ha la redacziun da giuventetgna «Battaporta» avischinà l'offerta da RTR ad in public pli giuven e rapportà en moda e maniera eccellente. Da l'autra vart na s'adressescha l'occurrenza betg ad in public fitg vast, quai che ha manà ad ina discussiun davart ils custs ed il niz da talas produziuns. Igl è però era da resguardar che RTR e la SRG SSR s'occupeschan, independentamain da quotas d'auditurs ed aspectaturs, explicitamain era da tematicas da nischa e da minoritads.

RTR ha rapportà a moda e maniera equilibrada dal project Parc Adula. Ils 3 da november 2016 è la debatta en connex cun il project vegnida trasmessa en directa da Mustér via livestream en las chasadas. Andri Franziscus ha persvadì sco moderatur e manader da la discussiun.

### **Infurmaziun da las elecziuns en ils Stadis Unids da l'America**

Il CP SRG.R ha era observà l'infurmaziun da RTR en connex cun l'elecziun dal president dals Stadis Unids da l'America che ha gì lieu ils 8 da november 2016. Durant la fasa avant las elecziuns ha RTR mess il focus sin l'intermediaziun objectiva da resultats. Avant il termin da l'elecziun èn ils rapports ed las infurmaziuns lura vegnidas intensivadas ed igl è era vegnì tratg a niz modas da rapportar innovativas sco per exempel via Skype. Il CP SRG.R ha era prendì notizia cun satisfacziun dal vast e cumplexiv dossier online installà sin [www.rtr.ch](http://www.rtr.ch). Medemamain lauda il cussegl la reportascha multimediala «LAS AMERICAS – Vita rumantscha vi sur mar» che ha purtretà trais Rumantschas ed in Rumantsch che vivan en ils Stadis Unids da l'America.

### **Premi schurnalistic SRG.R**

Il Cussegl dal public ha decidì da desister en l'avegnir da surdar il Premi schurnalistic SRG.R. Il reglament correspondent è vegnì abolì. Il Premi schurnalistic SRG.R onurava products schurnalistics da la chasa RTR ed è vegnì surdà ils onns 2013 enfin 2015. Il premi era dotà cun CHF 6'000.00. Il cussegl ha surdà ils ultims onns il premi a suandantas producziuns da RTR:

- 2013: «Allegra Rumantschs» da Livio Foffa e David Spinnler
- 2014: «Dal Magic Wood a l'Action Wood» da Petra Rothmund
- 2015: «Med Ursina i København» dad Astrid Alexandre

### **Prevista**

Il CP SRG.R è s'inscuntrà l'ultima giada en questa cumposiziun. La perioda d'uffizi actuala terminescha la fin da l'onn. Augustin Beeli, Letizia Sonder e Romeo Wasescha mettan a disposiziun lur uffizi sco commembers/-bras dal cussegl dal public SRG.R. Il president dal CP SRG.R, Michael Spescha, ed il commember Vito Stupan han remess lur uffizis pervia da la limitaziun dal temp d'uffizi. La proxima seduta dal CP SRG.R ha lieu ils 25 da schaner 2017. A partir dal 1. da schaner 2017 vegn il CP SRG.R lura presidià da Roger Tuor-Reuss da Mustér.

### **Infurmaziuns davart il cussegl dal public SRG.R**

Il cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Michael Spescha, president dal cussegl dal public SRG.R, telefonin 079 486 58 47  
Anna Maria Ratti, secretariat SRG.R, telefon 081 255 79 79